

Broj: 1/14

Datum, 19. rebiu-l-evvel 1435. h.g.

20. januar 2014. godine

Ustavna komisija Sabora Islamske zajednice, u skladu sa članom 79. Ustava Islamske zajednice, na sjednici održanoj 20. januara 2014. godine, utvrdila je

## **NACRT AMANDMANA NA USTAV ISLAMSKJE ZAJEDNICE U BOSNI I HERCEGOVINI**

### **AMANDMAN VI**

Preambula Ustava Islamske zajednice u Bosni i Hercegovini mijenja se i glasi:

Očitujući vjerovanje da nema drugog Boga osim Allaha, dželle šanuhu, i da je Muhammed Njegov rob i Njegov poslanik;

polazeći od Kur'ana časnog i ajetā: "Mi smo nebesima, Zemlji i planinama ponudili emanet, pa su se ustegli i pobjegli da ga ponesu, ali ga je preuzeo čovjek – a on je, zaista, prema sebi nepravedan i lahkomišlen" (33:72); "Džine i ljude stvorio sam samo zato da se klanjaju Meni..."(51:56); "Svi se čvrsto Allahovoga Užeta držite i nikako se ne razjedinjujte...!" (3:103); "O, vjernici, budite strpljivi i izdržljivi i na granicama bdijte i Allaha se bojte - da biste postigli ono što želite..." (3:200) te hadisa Allahovoga Poslanika, sallallahu alejhi ve sellem: "Ostavio sam vam dvije stvari, ukoliko ih se budete pridržavali, nećete nikada zalutati, a te su: Allahova Knjiga i moj sunnet",

i izražavajući nastojanje da se ovo vjerovanje provodi u život, po uzoru na Zajednicu muslimana koju je uspostavio Muhammed, sallallahu alejhi ve sellem, sa mu'minima i mu'minkama u Medini, što je nastavljeno od Hulefāi-r-rāšidīna, emevijskih i abasijskih halifa do osmanskih sultana: sultana Mehmeda Fatiha, koji je utemeljio ustanove islama u Bosni, halifa – sultana Selima I. i Sulejmana Zakonodavca, koji su uspostavili hilafet nad Bosnom, osmanskih halifa preko opunomoćenih šejhu-l-islama u vrijeme Osmanlija, putem menšure šejhu-l-islama reisu-l-ulemi u Sarajevu, držeći neprekinutu šerijatsku i duhovnu vezu sa Muhammedom, s.a.v.s., osiguravajući svoju samostalnost i prava potvrđena međunarodnim sporazumima i pravnim aktima, zajednici muslimana Bosne osigurana je jedinstvena pozicija:

- u odlukama Berlinskoga kongresa iz 1878. godine, sadržanim u Ugovoru, kojim se muslimani priznaju kao posebnost a islam kao vjera, i kojim se garantiraju osnovna ljudska, građanska i vjerska prava, čime se islam stavlja u istu ravan sa kršćanstvom i židovstvom u Evropi, kako slijedi: "Razlike u vjeri i vjeroispovijesti neće moći da budu smetnja da neko iz tog razloga bude isključen ili spriječen da uživa svoja građanska ili politička prava...; sloboda i javno vršenje crkvenih obreda svih vjeroispovijesti bit će zajamčeni svim građanima (...) kao i strancima i nikakve smetnje se neće moći praviti bilo hijerarhijskom uređenju raznih vjeroispovijesti bilo njihovim odnosima sa svojim duhovnim starješinama..." i kojim se Novopazarski sandžak tretira sastavnim dijelom starog vilajeta Bosne, čime je Novopazarska konvencija,

donijeta na temelju Berlinskog kongresa, omogućila održavanje jedinstva Bošnjaka-muslimana na cijelom njihovom prostoru od Kosovske Mitrovice do Une i Save" (član 25., 27., 30., 35. i 39.);

- u Carigradskoj konvenciji iz 1879. godine i protokolima koji su joj prethodili, propisano je: "Osigurati će se sloboda i vanjsko provođenje svih postojećih obreda osobama koje stanuju ili borave u Bosni i Hercegovini; muslimanima je posebno zajamčena potpuna sloboda u odnosima sa njihovim duhovnim poglavarima...; svaka agresija protiv muslimana, njihovih dobara ili njihove religije bit će strogo kažnjavana; Ime Njegovoga veličanstva Sultana i dalje će se izgovarati u javnim molitvama muslimana kao i ranije" (član 2. i čl. 2. Protokola I);

- imenovanjem prvog reisu-l-uleme 1882. godine u Bosni i Hercegovini i dodjelom menšure tome reisu-l-ulemi od šejhu-l-islama iz Carigrada, u ime halife - sultana iz Istanbula, te imenovanjem Ulema-i-medžlisa;

- rezultatima ostvarenim kroz Pokret za vjersko-prosvjetnu i vakufsko-mearifsku autonomiju, koji će se uspješno završiti donošenjem Štatuta 1909. godine;

- u odredbama Štatuta za autonomnu upravu islamskih vjerskih i vakufsko-mearifskih poslova u Bosni i Hercegovini, koga je potpisao austrougarski monarh u Beču 1909. godine, kojima se, između ostalog, osigurava pravo dodjele menšure reisu-l-ulemi Bosne i Hercegovine od halifinog šejhu-l-islama iz Carigrada;

- Zemaljski štatut za Bosnu i Hercegovinu iz 1910. godine Članom 8. uređuje: "Sloboda se vjere i savjesti ujemčava...; Vršenje vjerezakona u kući ujemčava se svakome, a javno članovima priznatih vjerskih udruženja...; sada priznata vjerska udruženja su: 1. muslimansko ...";

- u odredbama austrijskog Zakona o priznavanju sljedbenika islama iz 1912. godine, koji glasi: "Vjerska zajednica pripadnika islama prema hanefijskom obredu će uživati istu zaštitu koja je data ostalim pravno priznatim zajednicama";

- posebnim Zakonom o priznanju islamske vjeroispovjesti iz 1916. godine za Hrvatsku sa Slavonijom;

- saglasnošću kojom su 1916. godine muslimani Hrvatske i Slovenije dobili iz Beča, na vlastito traženje, pravo da se Štatut za autonomnu upravu Bosne i Hercegovine primjenjuje i u odnosu na njih i da reisu-l-ulema Bosne i Hercegovine svoje ovlasti proširi i na njih;

- činom dodjele menšure iz 1914. godine kada je hafiz Džemaludin-ef. Čaušević kao reisu-l-ulema Bosne i Hercegovine u Carevoj džamiji primio menšuru izdatu od halifinog šejhu-l-islama u Istanbulu, i sa tom menšuricom vršio funkciju reisu-l-uleme u Austro-Ugarskoj (1913. – 1918.), u Kraljevini SHS (1918. – 1929.) i u Kraljevini Jugoslaviji (1929.-1930.), šest godina nakon što je službeno ukinut Hilafet u Istanbulu;

- Senžermenskim ugovorom, kojim je Austrija 1919. godine, kao nasljednica Austro-Ugarske, osigurala da Kraljevina SHS ima na muslimane Bosne i Hercegovine, odnosno Kraljevine, primjenjivati odredbe

Berlinskog ugovora i Carigradske konvencije kao međunarodnu obavezu: “Muslimanima pružiti punu zaštitu, kako u pogledu njihovog ličnog integriteta tako i svim njihovim vjerskim ustanovama” (Čl.10.);

- Ustavom Islamske verske zajednice Kraljevine Jugoslavije iz 1930. godine osigurava se da “svi muslimani Kraljevine Jugoslavije čine jednu samostalnu versku zajednicu, na čelu sa Reisu-l-ulemom kao Vrhovnim vjerskim starešinom” (Čl.1.);

- Ustavom Islamske verske zajednice iz 1936 godine, kojim se osigurava pripadništvo svih muslimana ovoj jednoj i samostalnoj zajednici sa reisu-l-ulemom na čelu: “...u smislu propisa islama, duhovno jedinstvo sa ostalim vjerskim zajednicama” (Čl. 2.) te određuje sjedište reisu-l-uleme u Sarajevu (Čl. 90.);

- Ustavom Islamske vjerske zajednice u FNRJ iz 1947. godine, utvđuje se da Islamska vjerska zajednica “javno ispovijeda i uči svoju vjeru i samostalno upravlja i uređuje svoje vjerske, vjersko-prosvjetne i vakufsko-imovinske poslove...” (Čl.3.);

- Ustavom Islamske zajednice u SFRJ iz 1990. godine, Islamska zajednica se definira kao “jedinствена i samostalna zajednica” koja “djeluje na osnovu Kur'ana, sunneta i iz njih izvedenih propisa” (Čl 1.);

- Ustavom Islamske zajednice u Bosni i Hercegovini iz 1997. godine, Islamska zajednica definira se “kao jedna i jedinstvena zajednica muslimana”, a njezin “sastavni dio su mešihati Islamske zajednice Sandžaka, Hrvatske i Slovenije, te se Islamska zajednica u Bosni i Hercegovini smatra neodvojivim dijelom ummeta” (Čl. 1. i 2.);

polazeći od navedenog islamskog vjerovanja i principa, uključujući i princip veze sa poslanikom Muhammedom, sallallahu alejhi ve selem, Hilafetom, putem halifa, šejhu-l-islama i menšure reisu-l-uleme, iznesenih povijesnih činjenica, nepotrošivosti prava na slobodu vjere i prava osiguranih brojnim međunarodnim ugovorima, konvencijama i drugim pravnim aktima, Sabor Islamske zajednice u Bosni i Hercegovini na sjednici održanoj ----- donio je:”

#### **AMANDMAN VII**

Član 1. Ustava, koji je izmijenjen Amandmanom I, mijenja se i glasi:

“Islamska zajednica u Bosni i Hercegovini je zajednica muslimana u Bosni i Hercegovini, muslimana u Srbiji, Hrvatskoj i Sloveniji, muslimana Bošnjaka izvan domovinskih zemalja i drugih muslimana koji je prihvataju kao svoju.

Reisu-l-ulema predstavlja i zastupa Islamsku zajednicu.”

#### **AMANDMAN VIII**

Član 2. Ustava se briše.

#### **AMANDMAN IX**

U članu 5. Ustava, iza riječi “Pripadnici” dodaje se riječ “i članovi”.

## **AMANDMAN X**

Član 6. Ustava mijenja se i glasi:

“Islamska zajednica je samostalna u određivanju svojih ciljeva i uređivanju djelatnosti, organizacije, pravnih akata, izbornog postupka te u stjecanju imovine i njezinom upravljanju.”

## **AMANDMAN XI**

U članu 7. Ustava ispred stava (1) dodaje se novi stav koji glasi:

“Islamska zajednica se stara za ispravno razumijevanje i življenje islama i osiguravanje uvjeta za prenošenje Emaneta”.

Stavovi (1) i (2) postaju stavovi (2) i (3).

## **AMANDMAN XII**

U članu 8. Ustava u stavu (2) iza riječi “U tumačenju” dodaje se riječ “vjere”, a iza riječi “primjenjuje se” dodaju se riječi “principi ehli-sunnetskog učenja u akaidu”.

## **AMANDMAN XIII**

U članu 9. Ustava iza riječi “pripadnika” dodaje se riječ “i članova”, iza riječi “za očuvanje” dodaje se riječ “islamskih”, a iza riječi “porodičnog života” briše se tačka i dodaju riječi “uz zajedničko zalaganje muškaraca i žena”.

## **AMANDMAN XIV**

U članu 14. Ustava iza riječi “sa islamskim i” dodaje se riječ “drugim”.

## **AMANDMAN XV**

U članu 17. Ustava riječi “mogu se povjeravati” zamjenjuju se riječima “povjeravaju se”, a iza riječi “sredini u kojoj djeluju” briše se tačka i dodaju riječi “te koje su svojim radom doprinijele napretku Zajednice.”

## **AMANDMAN XVI**

U članu 21. Ustava riječi “bajrak i znak” zamjenjuju se riječima “znak i bajrak”.

## **AMANDMAN XVII**

Član 22. Ustava postaje član 23.

## **AMANDMAN XVIII**

Član 23. Ustava postaje član 22. te se mijenja i glasi:

“Znak Islamske zajednice čine polumjesec, otvoren na desnu stranu, i petokraka zvijezda u sredini polumjeseca.”

#### **AMANDMAN XIX**

U članu 26. Ustava iza riječi “Rijaset Islamske zajednice” dodaju se riječi “na osnovu astronomskog računanja vremena”.

#### **AMANDMAN XX**

U naslovu III. dijela Ustava iza riječi “PRIPADNIKA” dodaje se riječ “I ČLANOVA”.

#### **AMANDMAN XXI**

Član 27. Ustava mijenja se i glasi:

“Član Islamske zajednice je njen pripadnik koji prihvati članstvo u Islamskoj zajednici i izvršava propisane obaveze.

Obaveze člana Islamske zajednice su:

- da se pridržava islamskih normi, štiti islamske vrijednosti i čuva islamske običaje,
- da poznaje i primjenjuje propise Islamske zajednice,
- da plaća članarinu i daje redovne doprinose i druge priloge za potrebe Islamske zajednice
- da čuva ugled i jedinstvo Islamske zajednice.

Prava člana Islamske zajednice su:

- da slobodno izražava svoju pripadnost islamu i izvršava islamske dužnosti,
- da se islamski odgaja i obrazuje,
- da koristi ustanove Islamske zajednice u izvršavanju islamskih dužnosti,
- da sudjeluje u zajedničkim aktivnostima u džematu,
- da učestvuje u izborima za organe Islamske zajednice,
- da bude pravovremeno obavještavan o radu organa i ustanova Islamske zajednice,
- da se obraća organima Islamske zajednice radi zaštite svojih vjerskih prava,
- da u okvirima odgovarajućih propisa koristi imovinu Islamske zajednice.

Obaveze pripadnika Islamske zajednice su:

- da se pridržava islamskih normi, štiti islamske vrijednosti i čuva islamske običaje,
- da poznaje i primjenjuje propise Islamske zajednice,
- da daje redovne doprinose i druge priloge za potrebe Islamske zajednice,
- da čuva ugled i jedinstvo Islamske zajednice.

Prava pripadnika Islamske zajednice su:

- da slobodno izražava svoju pripadnost islamu i izvršava islamske dužnosti,
- da se islamski odgaja i obrazuje,

- da koristi ustanove Islamske zajednice u izvršavanju islamskih dužnosti,
- da sudjeluje u zajedničkim aktivnostima u džematu,
- da se obraća organima Islamske zajednice radi zaštite svojih vjerskih prava,
- da u okvirima odgovarajućih propisa koristi imovinu Islamske zajednice.“

#### **AMANDMAN XXII**

U članu 28. Ustava riječi “i druge stvari, prava i novčana sredstva” zamjenjuju se riječima “imovinska prava, novčana sredstva i druga imovina”.

#### **AMANDMAN XXIII**

U članu 29. Ustava iza riječi “Islamskoj zajednici za” dodaje se riječ “njene”.

#### **AMANDMAN XXIV**

U članu 30. Ustava u stavu (1) iza tačke (4) dodaje se nova tačka koja glasi “privrednih aktivnosti”.

#### **AMANDMAN XXV**

U članu 31. Ustava stav (3) mijenja se i glasi:

“Vijeće muftija Islamske zajednice može donijeti odluku da se vakufsko dobro zamijeni za dobro drugog lica ukoliko pouzdano utvrdi da je ovakva zamjena nesumnjivo u interesu vakufa. Ovakva odluka će biti valjana ako za nju na sjednici Vijeća muftija glasa dvije trećine članova.”

#### **AMANDMAN XXVI**

Član 32. Ustava mijenja se i glasi:

“Vakufskom imovinom upravljaju nāzir i Vakufska direkcija.

U upravljanju vakufskom imovinom obavezno se primjenjuju odredbe vakufname i vasijjeta, odnosno odredbe Šerijata.

Vakufska imovina se upisuje u jedinstveni Registar vakufa Islamske zajednice, što se uređuje posebnim aktom koga donosi Sabor.“

#### **AMANDMAN XXVII**

U V. dijelu Ustava prije člana 34. dodaje se novi član 33a, koji glasi:

“Islamska zajednica se organizira kao:

- džemat i medžlis,
- muftijstvo, odnosno mešihat,
- Sabor, reisu-l-ulema, Vijeće muftija, Rijaset i Ustavni sud.

Sabor, reisu-l-ulema, Vijeće muftija, Rijaset i Ustavni sud najviši su organi Islamske zajednice sa sjedištem u Sarajevu.“

#### **AMANDMAN XXVIII**

U članu 34. Ustava vrše se izmjene kako slijedi:

U stavu (2) broj “100” zamjenjuje se brojem “200”.

U stavu (3) iza riječi “odluku o formiranju” dodaje se zarez i riječi “spajanju ili ukidanju”, a riječ “muftije” zamjenjuje se riječju “muftijstva”.

Iza stava (3) dodaje se novi stav koji glasi: “Općim aktom koga donosi Sabor uređuju se pitanja vezana za džemat.”

#### **AMANDMAN XXIX**

U članu 36. Ustava vrše se izmjene kako slijedi:

U stavu (1) iza riječi “života” briše se tačka i dodaju riječi “i koji su članovi Islamske zajednice”.

Stav (2) mijenja se i glasi: “Skupština džemata bira: džematski odbor, zastupnike džemata u skupštinu medžlisa i delegate džemata za izbornu tijelo koje bira sabornike Islamske zajednice te donosi odluke koje se tiču organizacije i aktivnosti džemata i vjerskog života u džematu.”

#### **AMANDMAN XXX**

U članu 37. Ustava stav (3) riječi „stvarima“ zamjenjuje se riječju „pitanjima“.

#### **AMANDMAN XXXI**

Član 39. Ustava mijenja se i glasi:

„Medžlis je organizaciona jedinica Islamske zajednice koja u pravilu obuhvata sve džemate na teritoriji jedne općine ili najmanje sedam džemata koji čine povezanu cjelinu.

Odluku o osnivanju novog medžlisa ili pripajanju postojećeg medžlisa drugom medžlisu donosi Sabor na prijedlog Rijasetu.

Organi medžlisa su: skupština i izvršni odbor.

Skupštinu medžlisa čine izabrani zastupnici džemata.

Skupština medžlisa:

- bira radno predsjedništvo koje rukovodi radom skupštine
- bira članove izvršnog odbora medžlisa
- daje opće smjernice za rad izvršnog odbora medžlisa,
- usvaja godišnji plan i izvještaj o radu izvršnog odbora medžlisa,
- daje saglasnost na prijedlog budžeta i završni račun medžlisa.“

## **AMANDMAN XXXII**

U članu 40. Ustava vrše se izmjene i dopune kako slijedi:

U stavu (4) tačka (4) iza riječi "brine se o" dodaje se riječ "prihodima i".

Stav (5) mijenja se i glasi: "Predsjednik predstavlja i zastupa medžlis i rukovodi radom izvršnog odbora."

Iza stava (5) dodaje se novi stav koji glasi: "Općim aktom koga donosi Sabor Islamske zajednice u Bosni i Hercegovini uređuju se pitanja vezana za medžlis."

## **AMANDMAN XXXIII**

U članu 41. Ustava u stavu (1) broj "30" zamjenjuje se brojem "60".

## **AMANDMAN XXXIV**

Član 42. Ustava mijenja se i glasi:

"Glavni imam je nadležan i odgovoran za organizaciju i izvršavanje vjerskih poslova i aktivnosti na području medžlisa i odgovoran je za rad imamā, hatibā i muallimā.

Glavnom imamu u radu pomaže savjet, čiji se sastav i način rada uređuje aktom iz Člana 40. ovog ustava.

Glavni imam predstavlja medžlis u poslovima iz stava 1. ovog člana.

Glavni imam u pitanjima vjere odgovoran je muftiji, a u administrativnim stvarima odgovoran je izvršnom odboru medžlisa.

Nadležnosti glavnog imama u dijaspori bit će definirane posebnim aktom koga donosi Sabor.

Glavnog imama imenuje, premješta i razrješava dužnosti reisu-l-ulema na prijedlog muftije.

Mandat glavnog imama traje četiri godine sa mogućnošću ponovnog imenovanja."

## **AMANDMAN XXXV**

Iza člana 42. Ustava dodaje se novo poglavlje koje nosi naziv "MUFTIJSTVO" te članovi 42a., 42b. i 42c., koji glase:

"Član 42a.

Muftiluk je područje koje obuhvata više medžlisa koji čine teritorijalnu cijelinu.

U izuzetnom slučaju muftiluk može biti organiziran po funkcionalnom principu ili eksteritorijalno sa posebnom unutarnjom strukturom.

Odluku o uspostavljanju muftiluka i njegovom sjedištu na prijedlog Rijasetu, donosi Sabor."

"Član 42b.

Muftijstvo je upravni organ muftiluka.

Muftijstvo se sastoji od muftije i rukovodilaca službi.

Muftijstvo ima savjet za vjerska pitanja sastavljen od svih glavnih imama i rukovodilaca ustanova Islamske zajednice sa područja muftiluka i savjet za administrativna pitanja sastavljen od predsjednika medžlisa.



Muftijstva za svoj rad odgovaraju Rijasetu i Saboru.  
Na čelu muftijstva je muftija.”

“Član 42c.

Muftijstva na području svoga djelovanja obavljaju sljedeće poslove:

- predstavljaju godišnji plan rada, budžet, izvještaj o radu i izvještaj o realizaciji budžeta savjetima na svome području,
- organiziraju i nadziru aktivnosti islamskog obrazovanja,
- organiziraju i nadziru vjerske djelatnosti,
- organiziraju i nadziru podučavanje vjeri,
- organiziraju i nadziru prikupljanje zekata i sadekatu-l-fitra,
- organiziraju i nadziru aktivnosti izvršavanja obaveze kurbana,
- organiziraju i nadziru privredne i finansijske aktivnosti,
- usmjeravaju i nadziru rad medžlisa i džemata,
- izvršavaju poslove i aktivnosti kojima ih zaduže Rijaset i Sabor,
- podnose plan rada i izvještaj o radu Rijasetu, Vijeću muftija i Saboru,
- razmatraju plan rada i izvještaj o radu medžlisa.”

#### AMANDMAN XXXVI

Iza člana 42c. Ustava dodaje se novo poglavlje koje nosi naziv “MEŠIHAT” te članovi 42d., 42e., 42f., 42g., 42h. i 42i., koji glase:

“Član 42d.

U Islamskoj zajednici u Srbiji, Hrvatskoj i Sloveniji pored sabora kao predstavničkih i zakonodavnih organa postoje mešihati kao vjerski i administrativno-pravni organi.”

“Član 42e.

Na čelu mešihata je predsjednik mešihata – muftija, biran propisanom procedurom normativnih akata Islamske zajednice.

Kandidati za predsjednika Mešihata-muftiju u proceduri kandidature trebaju pribaviti prethodnu suglasnost reisu-l-uleme.

Izborom za predsjednika mešihata – muftiju, stekli su se uvjeti da se izvrši imenovanje muftije u skladu sa članom 42.”

“Član 42f.

Struktura mešihata odgovara strukturi Rijasetu.”

“Član 42g.

Mešihat je za svoj rad odgovoran predstavničkom i zakonodavnom organu na svom području. Objedinjene godišnje izvještaje podnosi Rijasetu, Vijeću muftija i Saboru.”

“Član 42h.

Mešihati na području svoga djelovanja obavlja sljedeće poslove:

- predlažu godišnji plan rada, budžet, izvještaj o radu i izvještaj o realizaciji budžeta predstavničkom i zakonodavnom organu na svom području,
- organiziraju i nadziru aktivnosti islamskog obrazovanja,
- organiziraju i nadziru vjerske djelatnosti,
- organiziraju i nadziru podučavanje vjeri,
- organiziraju i nadziru prikupljanje zekata i sadekatu-l-fitra,
- organiziraju i nadziru aktivnosti izvršavanja obaveze kurbana,
- organiziraju i nadziru privredne i finansijske aktivnosti,
- usmjeravaju i nadziru rad medžlisa i džemata,
- izvršavaju poslove i aktivnosti kojima ih zaduže Rijaset i Sabor,
- podnose objedinjeni izvještaj o radu Rijasetu, Vijeću muftija i Saboru,
- razmatraju i usvajaju plan rada i izvještaje o radu medžlisa.“

„Član 42i.

Predsjednik mešihata – muftija, u okviru svojih prava i dužnosti:

- predstavlja Islamsku zajednicu i zastupa njene interese u zemlji u kojoj djeluje,
- predstavlja Islamsku zajednicu u poslovima saradnje s vjerskim zajednicama i organizacijama u zemlji i inozemstvu,
- predstavlja Islamsku zajednicu u poslovima saradnje s državnim organima i organizacijama, društvenim i drugim institucijama, a posebice razvija saradnju na unapređenju međukonfesionalnog odnosa Islamske zajednice i drugih konfesija,
- odgovara za finansijsko poslovanje Islamske zajednice,
- saziva sjednice mešihata i predsjedava njima te se stara o provedbi odluka mešihata i sabora Islamske zajednice,
- nadzire i usmjerava rad službi mešihata, predsjednika izvršnih odbora medžlisa te direktora ustanova i organizacija koje je osnovao mešihat i sabor Islamske zajednice,
- tumači islamske norme i izdaje fetve,
- zaustavlja od izvršenja svaku odluku organa i ustanova Islamske zajednice sa područja mešihata za koju ocijeni da je u suprotnosti sa islamskom normom,
- izdaje rješenja za vršenje vjerskih poslova glavnim imamima, imamima, hatibima, muderrisima, vjeroučiteljima i nastavnicima u osnovnim i srednjim školama, dušobrižnicima u zatvorima i vjerskim namještenicima u vojsci, policiji, posebne ovlasti imamima – matičarima.
- Nakon provedene procedure, a prije izdavanja rješenja, predsjednik mešihata – muftija, obraća se reisu-l-ulemi za izdavanje dekreta o postavljenju imenovanom.
- Obavljaju sve poslove iz nadležnosti koje su specifične za područje njihova djelovanja.“

#### **AMANDMAN XXXVII**

Član 43. Ustava se briše.

#### **AMANDMAN XXXVIII**

Član 44. Ustava se briše.

#### **AMANDMAN XXXIX**

Član 45. Ustava mijenja se i glasi:

“Muftija je glavni vjerski autoritet na području muftiluka, odnosno mešihata. Muftija predsjedava muftijstvom, odnosno mešihatom.

Potvrđivanje imenovanja i razrješenje dužnosti muftije vrši Sabor Islamske zajednice na prijedlog reisu-l-uleme.

Za muftiju može biti imenovan alim koji posjeduje srednje i visoko islamsko obrazovanje, koji je svojim poznavanjem islamskog učenja i svojim ponašanjem stekao ugled među pripadnicima, odnosno članovima Islamske zajednice i koji ima najmanje deset godina rada u Islamskoj zajednici.

Kandidat za vršenje funkcije muftije ne može biti stariji od 62 godine. Muftija predstavlja i zastupa muftijstvo, odnosno mešihat te:

- tumači islamske norme i izdaje fetve,
- nadzire rad glavnih imama, imama, hatiba, muallima, muderrisa i vjeroučitelja,
- stara se o zaštiti vjerskih prava muslimana,
- brine se o uvjetima za izvršavanje islamskih dužnosti,
- stara se o izvršavanju odluka i uputa viših organa Islamske zajednice,
- predlaže imenovanje, razrješenje i premještaj glavnih imama,
- rukovodi i predsjedava muftijstvom, odnosno mešihatom,
- vrši i druge poslove iz svoje nadležnosti.”

#### **AMANDMAN XL**

Član 46. Ustava mijenja se i glasi:

“Mandat muftije traje pet godina s mogućnošću izbora na još jedan mandat.”

#### **AMANDMAN XLI**

Član 47. Ustava se briše.

#### **AMANDMAN XLII**

Član 48. Ustava mijenja se i glasi:

„Muftija je u radu odgovoran reisu-l-ulemi i Saboru pred kojima polaže i zakletvu.“

### **AMANDMAN XLIII**

Član 49. Ustava mijenja se i glasi:

„Rijaset Islamske zajednice je najviši izvršni organ za vjerske, obrazovne, ekonomske, finansijske, pravne i druge poslove Islamske zajednice u Bosni i Hercegovini.

Rijaset se organizira kroz uprave kao stručne, administrativno-upravne cjeline, na čijem čelu se nalaze direktori uprava.

Općim aktom koga na prijedlog Rijaseta donosi Sabor uređuju se organizacija i način funkcioniranja Rijaseta .

Rijaset sačinjavaju direktori uprava, zamjenik reisu-l-uleme i reisu-l-ulema, koji je na čelu Rijaseta te koji rukovodi i predsjedava Rijasetom.

Direktore uprava kao članove Rijaseta na prijedlog reisu-l-uleme imenuje Sabor.

Pored članova Rijaseta iz prethodnog stava reisu-l-ulema može imenovati do jedne trećine članova Rijaseta uz potvrdu Sabora.

Mandat direktora uprava je četiri godine, s mogućnošću izbora na još jedan mandat.”

### **AMANDMAN XLIV**

Član 50. Ustava se briše.

### **AMANDMAN XLV**

Član 52. Ustava mijenja se i glasi:

“Rijaset Islamske zajednice:

- stara se o cjelokupnom vjerskom životu i ustavnoj utemeljenosti svih djelatnosti u Islamskoj zajednici na načelima Šerijata, odnosno hanefijskog mezheba,
- priprema strategiju i pravce razvoja i rada organa i ustanova Islamske zajednice u Bosni i Hercegovini,
- izvršava odluke Sabora Islamske zajednice u Bosni i Hercegovini i Vijeća muftija,
- predlaže Saboru budžet i završni račun,
- podnosi izvještaj o svome radu Saboru Islamske zajednice u Bosni i Hercegovini,
- vrši nadzor nad radom izvršnih organa i ustanova u Islamskoj zajednici,
- usmjerava i nadzire rad mešihata i muftijstava,
- postavlja i razrješava upravne/školske odbore islamskih i drugih obrazovnih i odgojnih ustanova Islamske zajednice u Bosni i Hercegovini,
- daje saglasnost na postavljenje i razrješjenje dekana i direktora islamskih i drugih obrazovnih ustanova,
- odobrava planove i programe vjerskih predmeta i udžbenika obrazovnih i odgojnih ustanova Islamske zajednice te programe i udžbenike za vjeronauku uz prethodno pribavljenu saglasnost Vijeća muftija,
- osigurava zaštitu vjerskih prava muslimana,

- donosi propise o službenoj nošnji i obilježjima vjerskih predstavnika i zaposlenika u Islamskoj zajednici,
- organizira i nadzire prikupljanje zekata i sadekatu-l-fitra te upravlja fondom „Bejtu-l-mal“,
- organizira i nadzire aktivnosti organizacije hadža,
- organizira i nadzire aktivnosti izvršavanja obaveze kurbana,
- uspostavlja i vodi Registar vakufa Islamske zajednice,
- provodi odluke o zamjeni vakufske imovine,
- uspostavlja i održava neposredne veze sa drugim islamskim zajednicama u svijetu,
- izdaje rješenja o upisu u registar islamskih odgojno-obrazovnih ustanova i drugih odgojno-obrazovnih ustanova Islamske zajednice,
- odobrava osnivanje preduzeća i daje saglasnost za pristupanje drugim preduzećima,
- osniva fondove, urede, centre, agencije, preduzeća, institute i druge ustanove,
- potvrđuje izbor nastavnog osoblja Fakulteta islamskih nauka i drugih visokoškolskih ustanova Islamske zajednice u Bosni i Hercegovini,
- daje saglasnost za prijem nastavnog i odgajateljskog osoblja u odgojno-obrazovnim ustanovama Islamske zajednice u Bosni i Hercegovini,
- uspostavlja i održava veze sa drugim vjerskim zajednicama,
- usmjerava i nadzire rad dijaspore,
- postavlja, premješta i razrješava službenike Rijasetu,
- stara se o urednom vođenju matičnih knjiga Islamske zajednice,
- vrši i druge poslove iz svoje nadležnosti koje mu u nadležnost stavi Sabor svojim odlukama.“

#### **AMANDMAN XLVI**

U članu 54. Ustava iza riječi “podnosi” dodaje se riječ “godišnji”, a iza riječi “o radu” dodaju se riječi “i izvršenju budžeta”.

#### **AMANDMAN XLVII**

Iza člana 54. Ustava dodaje se novo poglavlje koje nosi naziv “VIJEĆE MUFTIJA” te član 54a., koji glasi:

„Vijeće muftija je organ Islamske zajednice za pitanja vjere i donošenje fetvi. Vijeće muftija sastoji se od svih muftija u Islamskoj zajednici. Muftija postaje član Vijeća imenovanjem za muftiju, a prestaje biti član Vijeća prestankom mandata muftije.

Na čelu Vijeća muftija je reisu-l-ulema, koji rukovodi radom Vijeća, i njegov glas je odlučujući u slučajevima kada za ili protiv neke odluke Vijeća glasa isti broj muftija.

Važne odluke Vijeće muftija donosi tajnim glasanjem, u kom slučaju se odluka smatra donijetom ako je za odluku glasalo dvije trećine članova Vijeća. Važne odluke su one odluke koje Vijeće muftija proglasi takvim natpolovičnim brojem glasova članova Vijeća.

#### Vijeće muftija:

- osigurava valjanost razumijevanja i življenja islama i uređenje svih djelatnosti u Islamskoj zajednici na temelju načela islama i u skladu sa islamskom tradicijom i praksom Bošnjaka,
- kontrolira šerijatsku legitimnost normativnih akata i djelatnosti svih organa i funkcionera Islamske zajednice,
- brine o općem prihvaćanju i vjerodostojnoj primjeni islamskih normi u Islamskoj zajednici kroz autoritativno tumačenje vjerskih propisa na osnovu hanefijskog mezheba i maturidijskog akaida te kroz davanje autoritativnih odgovora na nova pitanja i probleme u vjerskom životu muslimana,
- brine o unapređenju ispravnog i oplemenjujućeg razumijevanja islama među pripadnicima Islamske zajednice, a posebno o:
  - poticanju idžtihada među ulemom i učenjacima Islamske zajednice,
  - očitovanju prema pojavama novih učenja i vjerskih gledišta među pripadnicima Islamske zajednice,
  - zalaganju za afirmaciju islamskih vrijednosti i islamskog mišljenja u različitim istraživačkim, naučnim, društvenim i humanističkim pitanjima koja se tiču vjere i vjerskog identiteta muslimana,
- prati tokove vjerskog, društvenog, političkog i kulturnog života, procese javnog i privatnog obrazovanja i informiranja građana, razmatra pojave, ponašanja i tumačenja kojima se ugrožava sloboda vjere i uvjerenja uključujući slobodu javnog svjedočenja vjere, pravo očitovanja svojih vjerskih osjećanja i uvjerenja obavljanjem obreda, izvršavanjem i pridržavanjem vjerskih propisa, držanjem do običaja i drugih vjerskih aktivnosti,
- prati procese koji relativiziraju etička i društvena zla poput blasfemije, pornografije, prostitucije i sodomije ili koji potiču raspirivanje vjerske mržnje, omalovažavanje ili izrugivanje vjere, odnosno ometaju očitovanje vjere ili uvjerenja kao i zastupanja načela svoje vjere i ravnanja prema njima, reagira na sve akte i procese koji su u suprotnosti sa etikom i moralom islama i koji ugrožavaju prava i interese muslimana,
- pokreće inicijativu za donošenje i izmjene Ustava i drugih normativnih akata u Islamskoj zajednici koji se odnose na vjerska pitanja,
- daje saglasnost za osnivanje vakufa,
- donosi odluke o zamjeni vakufske imovine,
- daje prethodnu saglasnost na planove i programe vjerskih predmeta i udžbenika obrazovnih i odgojnih ustanova Islamske zajednice te programe i udžbenike za vjeronauku,
- daje mišljenje o programima vjerskog djelovanja, razmatra godišnji plan i izvještaj Rijasetu i daje preporuke,
- prati kretanje u međureligijskim odnosima na području svoga djelovanja i u svijetu i daje smjernice,
- razmatra planove rada i izvještaje o radu muftijstava i mešihata
- obavlja i druge poslove iz svoje nadležnosti.

Vijeće muftija donosi odluke i stavove za poslove iz svoje nadležnosti, koje su obavezne za sve organe Islamske zajednice.

Vijeće muftija daje preporuke i pokreće inicijative.

Vijeće muftija podnosi izvještaj o radu Saboru.“

## AMANDMAN XLVIII

Član 55. Ustava, koji je izmijenjen Amandmanom II, mijenja se i glasi:

“Reisu-l-ulema je poglavar i vrhovni muftija Islamske zajednice.

Reisu-l-ulema je najviši vjerski autoritet Islamske zajednice koji predstavlja jedinstvo dina i ummeta u Islamskoj zajednici.

Reisu-l-ulema:

- stara se o ostvarivanju poziva Zajednice, prenošenju Emaneta i postizanju cilja Zajednice,
- planira, vodi, usmjerava i nadzire vjerski život u Islamskoj zajednici,
- predstavlja i zastupa Islamsku zajednicu,
- postavlja imame, glavne imame i muftije,
- izdaje murāsele, dekrete i certifikate muftijama, glavnim imamima, imamima, hatibima, muallimima, muallimama, muderrisima, vjeroučiteljima i drugim nosiocima vjerskog autoriteta u Islamskoj zajednici,
- daje prijedlog Saboru za potvrđivanje imenovanja i razrješenja muftija te prijedlog za imenovanje članova Rijasetu i direktore direkcija,
- zaustavlja od izvršenja svaku odluku organa Islamske zajednice za koju ocijeni da je u suprotnosti sa islamskim normama i nalaže njezino usklađivanje sa islamskim normama,
- organizira i nadzire rad uprava i direkcija Rijasetu,
- saziva sjednice Rijasetu i Vijeća muftija i predsjedava njima,
- izdaje naloge i potpisuje sva akta Rijasetu i Vijeća muftija Islamske zajednice,
- reisu-l-ulema može zatražiti vanredne izvještaje od mešihata,
- vrši i druge poslove iz svoje nadležnosti.

Reisu-l-ulema može pismenim putem prenijeti obavljanje pojedinih poslova iz svoje nadležnosti na članove Rijasetu.

Reisu-l-ulema donosi fetve. Reisu-l-ulema ima fetvi-emina.

Reisu-l-ulema za svoj rad odgovara Saboru.

Sjedište reisu-l-uleme je u Sarajevu.”

## AMANDMAN XLIX

Član 57. Ustava, koji je izmijenjen Amandmanom III, glasi:

“Reisu-l-ulemu bira tijelo koje sačinjavaju: sabornici Islamske zajednice, članovi Rijasetu Islamske zajednice, muftije, predsjednici mešihata Islamske zajednice, dekani i direktori islamskih ustanova, glavni imami, predsjednici izvršnih odbora medžlisa.”

Alternativni prijedlog promjene člana 57. Ustava glasi:

“Reisu-l-ulemu bira i razrješava tijelo čiji sastav utvrđuje Sabor Islamske zajednice posebnim aktom.”

#### **AMANDMAN L**

U članu 58. Ustava, koji je izmijenjen Amandmanom IV, u stavu (4) riječi "po preuzimanju" zamjenjuju se riječima "prilikom preuzimanja".

#### **AMANDMAN LI**

Član 59. Ustava mijenja se i glasi:

"Status reisu-l-uleme kojem je istekao mandat urediće se posebnim pravilnikom kojeg donosi Rijaset."

#### **AMANDMAN LII**

"Reisu-l-ulemi pomaže u radu i zamjenjuje ga u njegovoj odsutnosti zamjenik reisu-l-uleme.

Na prijedlog reisu-l-uleme, zamjenika reisu-l-uleme imenuje Sabor najkasnije tri mjeseca od preuzimanja dužnosti reisu-l-uleme.

Mandat zamjenika reisu-l-uleme traje koliko i mandat reisu-l-uleme, uz mogućnost izbora za još jedan mandat.

Zamjenik reisu-l-uleme, između ostalog, obavlja i sljedeće poslove:

- koordinira rad uprava Rijasetu,
- koordinira saradnju muftijstava, odnosno mešihata,
- nadzire rad muftijstava odnosno mešihata, posebno u izvršavanju obaveza prema ovom ustavu, drugim općim aktima te odlukama i zaključcima Sabora i Rijasetu Islamske zajednice u Bosni i Hercegovini,
- pomaže reisu-l-ulemi u obavljanju poslova iz njegove nadležnosti,
- obavlja i druge poslove prema odlukama i uputama reisu-l-uleme."

#### **AMANDMAN LIII**

Član 61. Ustava mijenja se i glasi:

„Zamjenik reisu-l-uleme za svoj rad odgovara reisu-l-ulemi i Saboru.“

#### **AMANDMAN LIV**

Član 62. Ustava mijenja se i glasi:

"Sabor je najviše predstavničko i zakonodavno tijelo Islamske zajednice.

Nadležnost Sabora:

- donosi ustav i druge propise kojima se uređuju organizacija i djelovanje organa i ustanova Islamske zajednice,
- određuje strategiju i pravce razvoja Islamske zajednice,



- daje smjernice za rad organa i ustanova za upravljanje imovinom Islamske zajednice,
- donosi budžet i usvaja završni račun Islamske zajednice,
- odobrava osnivanje udruženja u Islamskoj zajednici,
- potvrđuje imenovanje i razrješenje muftija
- imenuje i razrješava članove Rijasetu,
- imenuje članove Ustavnog suda Islamske zajednice,
- imenuje članove stalnih i povremenih saborskih komisija,
- razmatra i usvaja izvještaje o radu: reisu-l-uleme, Rijasetu, Vijeća muftija, mešihatā, muftijstava i dr.,
- donosi propise o upotrebi bajraka i znaka Islamske zajednice,
- vrši i druge poslove iz svoje nadležnosti.“

#### **AMANDMAN LV**

U članu 63. Ustava u stavu (5) riječ “članom” zamjenjuje se riječju “stavom”.

#### **AMANDMAN LVI**

Član 64. Ustava mijenja se i glasi:

“Sabor Islamske zajednice ima predsjednika, dva potpredsjednika i sekretara.

Predsjednika, potpredsjednike i sekretara Sabora biraju sabornici na konstituirajućoj sjednici.

Sabor ima stalne komisije za pojedine oblasti, a po potrebi može imenovati i povremene komisije. Rad komisija uređuje se poslovníkom o radu, koga donosi Sabor.

Predsjednik Sabora saziva sjednice Sabora najmanje dva puta godišnje.

Predsjednik je dužan sazvati sjednicu Sabora ako to od njega zatraži, uz pisano obrazloženje, najmanje jedna četvrtina sabornika, Rijaset ili reisu-l-ulema.

Sabor radi putem sjednica Sabora i komisija Sabora.”

#### **AMANDMAN LVII**

Iza člana 64. Ustava dodaje se novi član 64a., koji glasi:

„Islamska zajednica u dijaspori organizira se po jedinstvenim i jednakim principima.

Način organiziranja Islamske zajednice u dijaspori uređuje se posebnim aktom koga donosi Sabor.“

#### **AMANDMAN LVIII**

U članu 65. Ustava stav (1) mijenja se i glasi:

“Ustavni sud Islamske zajednice je vrhovni organ za ocjenu ustavnosti akata i rada ustanova i organa Islamske zajednice.“

#### **AMANDMAN LIX**

U člana 66. Ustava u stavu (1) tačka (1) mijenja se i glasi:

“- ocjenjuje ustavnost općih i pojedinačnih pravnih i drugih akata organa i ustanova svih nivoa organiziranja Islamske zajednice”.

Iza tačke (3) dodaje se nova tačka koja glasi:

- „vrši apelacionu nadležnost u odnosu na slučajeve disciplinske odgovornosti osoba imenovanih od strane reisu-l-uleme i Sabora.“

#### **AMANDMAN LX**

U nazivu dijela VI. Ustava iza riječi “USTANOVE” dodaju se riječi “I PRIVREDNA DRUŠTVA”.

#### **AMANDMAN LXI**

U članu 69. Ustava iza riječi “odgojno-obrazovne”, dodaju se riječi “naučnoistraživačke, kulturne,”, a iza riječi “Islamske zajednice” briše se tačka i dodaju riječi “i privrednim društvima”.

#### **AMANDMAN LXII**

U članu 70. Ustava iza riječi “sposobnosti” briše se tačka i dodaju riječi “i koje su se dokazale posebnim rezultatima”.

#### **AMANDMAN LXIII**

U članu 73. Ustava u stavu (1) riječi “pripadnik džemata” zamjenjuju se riječima “njezin član”, a u stavu (2) riječi “pripadnik džemata koji je navršio osamnaest godina” zamjenjuju se riječima “njezin član koji je član Islamske zajednice najmanje tri godine prije izbora”.

#### **AMANDMAN LXIV**

U članu 74. Ustava u stavu (3) iza riječi “predstavničkim” dodaje se riječ “tijelima”, a iza riječi “organima” dodaju se riječi “na istom nivou organizovanja”.

#### **AMANDMAN LXV**

U članu 75. Ustava stav (3) mijenja se i glasi:

“Mandat imenovanih zvaničnika Islamske zajednice: članova Rijasetu, dekana, direktora odgojno-obrazovnih ustanova, direktora direkcija, agencija, fondova, preduzeća, instituta, biblioteka, arhiva, urednika medija traje četiri godine s mogućnošću izbora na još jedan mandat.”

#### **AMANDMAN LXVI**

U članu 76. Ustava u stavu (1) iza riječi “predstavničkim” dodaje se riječ “tijelima”.

#### **AMANDMAN LXVII**

U nazivu dijela VIII. Ustava riječi "U RATNIM UVJETIMA" zamjenjuju se riječima "U VANREDNOM I RATNOM STANJU".

#### **AMANDMAN LXVIII**

Član 77. Ustava mijenja se i glasi:

"U vanrednom i ratnom stanju, koje proglasi država, sva tijela, organi i ustanove Islamske zajednice dužni su nastaviti svoj rad prilagođavajući se vanrednom i ratnom stanju.

Za organizaciju i odvijanje rada tijela i organa i ustanova Islamske zajednice u vanrednom i ratnom stanju odgovorni su predsjednici tijela, organa i direktori ustanova."

#### **AMANDMAN LXIX**

Član 78. Ustava, koji je izmijenjen Amandmanom V, mijenja se i glasi:

"U slučaju nemogućnosti funkcioniranja Sabora, Rijasetu i Vijeća muftija Islamske zajednice, prava i obaveze Sabora, Rijasetu i Vijeća muftija prenose se na posebno tijelo, koje sačinjavaju:

- reisu-l-ulema,
- predsjednik i potpredsjednici Sabora,
- zamjenik reisu-l-uleme,
- članovi Rijasetu koji mogu sudjelovati u radu tijela,
- muftije koji mogu sudjelovati u radu tijela."

#### **AMANDMAN LXX**

Član 79. Ustava mijenja se i glasi:

"Ustav se može mijenjati u cijelosti ili ustavnim amandmanima.

Donošenje i promjenu Ustava vrši Sabor po postupku propisanom ovim Ustavom.

Inicijativu za donošenje i promjenu Ustava može podnijeti najmanje trećina članova Sabora, Vijeće muftija ili Rijaset.

O inicijativi za donošenje i promjenu Ustava odlučuje Sabor natpolovičnom većinom od ukupnog broja članova Sabora.

Inicijativu za donošenje i promjenu Ustava Sabor upućuje Vijeću muftija i Rijasetu radi davanja mišljenja ukoliko isti nisu predlagači.

Nacrt akta o promjeni Ustava utvrđuje Ustavna komisija Sabora.

Nacrt akta o promjeni Ustava stavlja se na javnu raspravu, koja ne može trajati kraće od 30 dana, nakon kojeg Ustavna komisija utvrđuje prijedlog akta o promjeni Ustava i upućuje ga Saboru.

Za donošenje i promjenu Ustava neophodno je prisustvo najmanje dvije trećine sabornika.

Odluka o donošenju ili promjeni Ustava je valjana ako je za nju glasalo najmanje dvije trećine od ukupnog broja sabornika.

Usvojenu promjenu Ustava Sabor proglašava svojom odlukom.

Ako promjena Ustava ne bude usvojena o tome se ne može ponovo odlučivati prije isteka jedne godine od dana kada je prijedlog odbijen.

#### **AMANDMAN LXXI**

Član 80. Ustava mijenja se i glasi:

“Islamska zajednica u Srbiji, Islamska zajednica u Hrvatskoj i Islamska zajednica u Sloveniji te islamske zajednice u dijaspori uređuju organizaciju vjerskog života na svome području svojim aktima u skladu sa ovim Ustavom.

Usvojeni akti iz stava 1. ovog člana dostavljaju se Rijasetu i Vijeću muftija radi utvrđivanja usklađenosti sa ovim Ustavom.”

#### **AMANDMAN LXXII**

U članu 82. Ustava iza riječi “u skladu sa” dodaje se riječ “Šerijatom i”.

#### **AMANDMAN LXXIII**

Iza člana 82. Ustava dodaje se novi član 82a. koji glasi:

“Postojeća normativna akta svih organa i institucija Islamske zajednice uskladit će se sa odredbama ovog ustava u roku od šest mjeseci nakon stupanja na snagu ovih amandmana.”

“Nakon usvajanja ustavnih amandmana u roku od šest mjeseci izvršit će se konstituiranje novouspostavljenih organa na temelju ustavnih izmjena. Mandat članova novouspostavljenih organa teče od dana konstituiranja tih organa.

Mandat postojećih tijela i organa Islamske zajednice koji se ne mijenjaju ustavnim amandmanima ostaje nepromijenjen i navedeni organi nastavljaju sa svojim radom na osnovu važećih ustavnih odredbi prema kojima su ti organi ustanovljeni, odnosno članovi izabrani.

Usvojeni Amndmani stupaju na snagu danom donošenja i bit će objavljeni u Glasniku Rijasetu Islamske zajednice.”

Predsjednik Ustavne komisije Sabora

Jusuf Zahiragić